



O Volapükaf lens Valöpo !

Redakan Sirkülapenäda binom fopan! Bagaf telid ānūnom olis, das «*Datuval* id esedom obe penedi . . . » Sunādo *Cifal* epenom obe ad sagōn, das no binom so bāldik! Ho vi! Binob ob it, kel binom bāldik, no-li? Sedob ome sākusadi obik ladōfik.

Ās sevols osi, *Cifal Bishop* binom slopan pūka latinik as pūk bevūnetik adelik. Pūk at no binon fasilik ad lārnōn e sōl *Gerald Murphy* se pofazif *Liverpool* in *Linglān* no suādūkom in tef at. Penom:-

„Ekō sirkulam et lulyelik dōnu! Pūk latinik binon dōnu in vogād. No kanob vitōn tikodi, das lanālim nulik tefū pūk at debon osi ledesire lucādik vōna. Fovo utos, kelos stunūkos obi mōdo binon nekom licinana balid pūka latinik, sevabo: *Litaliyānapūk* in studadis in pūkas foginik in juls āsi lejuls in lān at, plāamū tidodems kōsōmik pro vakenans. *Litaliyānapūk* kobūkōn dilis valik diletas sūntagik e gramatikas, kels, ma tidans, ledutons lū pūk latinik; *Litaliyānik* binon pūk nulādik, kel labon veūti levemik pro obs as Yuropans. Estudob pūki latinik in jul e pos yels anik ākanob spikōn gudiko *Litaliyānapūki*. No dotob vōladi tefik onas. Utos, kelos āmaskaros as stud latinik in jul obik ābinon gagot voik; āmutobs konyugōn, deklinōn e miedetōn vōdis setas diotik ās : «feilans āvitoms sagitis nafanas» e somikos. Ābinos ga dil steifūlas smilōfik zifalejulas ad zūpādōn julis livātik i ad kotenūkōn laidāli niverik, das studans mutons dalabōn xami stabōfik in pūk latinik. Begō! gūflekolōs tonodasirkoti !! (= discuss).”

Jinos, das sōl *Murphy* binom slopan ni pūka latinik, ni Volapūka, ni Sperantapūka, ni ela Interlingua!

Valikosi Gudikūn Oles ed Olikanes

Ralph

PÜK LATINIK AI LIFÖL
FA S. N. KALEGIN

Dabinon ced ti valöpo dasumöl, das pük latinik binon pük deadik, bi Romän, kö äspikoy püki latinik ya vönao no plu dabinon.

Pos däfal Romäna Vesüdik dü yeltum lulid, pük oka ämuton deadön, bi Lamporän Lofüdik Büzantänik äbinon polan kuliva Grikänik. Jenöfo pük latinik epikotälük äfinon as pük somik, e su stab ota püks votik defomons, as sam püks "nulik" penemöl : Litaliyänik, Fransänik, Spanyänik e votiks.

Ye klöpaio erigon-li pük latinik Zänodatimäda, medü kel tumots lautotas nolavik e godaviks pädunons äsi milots setülas e poedotas ?

Verat binon, das pük latinik no lölöfiko ideadon. Fom literatavik äfövon e pägebön nog sekaliegiko dü plu ka yels mil as pük bevünetik, bü valikos in nolav. Ab no te äpenoy me pük at, ab id äspikoy. In tidöps löpikum mödik tidod pädunon te medü pük latinik; medü pük at kult pädunon, e klüluko medü pük latinik äspodoms nolavans.

Sekü atos, dü tim at pük äfövon ad daglofön. E gebäd at literatava latinik äbinon kod gemoteda püka me sinif veratik vöda, sevabo : su stab foma literatavik, da yelmils mödik dakipöla, ägemotedon pük pöpedik. E fümiko Zänodatimäd äpledon roull, sosus äprimoy ad gegolön lü Vönädöt, ai plu lü püks vönädik e lü lautots fa poedans gretik yelas vönädik.

Anu kanoy sagön, das atos äbinos bü tim lunik, nog dü Zänodatimäd: posä äkömon timäd votik, ven Fransänapük ädareigon

e pük latinik tio päglömon. Yeltums deglölid - degzülid äbinons yeltums nuläda e mödikos ägoles pödio. Pük latinik päplaädon fa püks nulik. Ün tim et literatav Fransänik e Deutänik vifiko äprogedon.

Ye äfövoy ad studön püki latinik in juls löpikum ed in nivers. Samo : in zif Paris ädabinon igo "Harat Latinik" sonemik, kö valikos ätidos medü pük latinik. Atos temunos nämi lifik e stuniki püka, medü kel päjafons lautotis nedeädöfik, kelis äfövoy e fövoy ad tradutön jünü.

Ün tim obas steifüloy ad geblinön püki at ad pagebön pro tefs bevünetik. In läns difik vola pabükons gasesds, samo : MAS (Fransän), MELISSA (Belgän), VOX LATINA (Deutän) e vödabukis. Jafoy lautotis nulik e bükoy bukis. Fovo lautoy lautotis nolavik, spodoy, noganükoy kobikamis; radion igo vobon in tef at.

Nu gekömobsös begöl! lü tiäd lartüga oba e datikobsös : kanoy-li nemön "pedeadöli" püki, kel ya dü plu ka yels telmil binon stum tefas pükik bevünetik, medü kel jafoy literati e fövoy ad kosädön ko milats menas travärü vol lölik?

No! Pük latinik lifon jünü, ab evedon plu ka "pük liföl" - evedon suspük, kel duton alikane, kel studon oni !

II II II II II II II II II II II II II

YEGIJONIANS

Odugolob lifi te balna. Jonobös flenöfi lenu, bi no obestepob vegi at dönu.
(William Penn)

Ven mus besmilon kati, ekö hog nilo.

(Spiket Nigeriyänik)

TÄVAVENTÜR IN KURDÄN (II) FA DOKAN KARL MAY

"No! *Halef* kuradik oba neai elabom dremäli!"

Sevälöfiko ätulom lipabalibi okik, kel ädavedon nedeto se hers nemödik e deto se hers anik, älumufükom turbani se flom; in säed fom smalik e nepinädik oma päjadamagodon so geiliko äs äkanon, ed ämufovükom günülis me läten petegölis. Pos preparam at magädabik, äsagom fefo :

"Sagol verati, *êfendî* (= o söl ledigik), binol man sapikün e krigan gretikün Vesüdäna, labol günü fümik ad deidön leoni e beri; dalabol günü, se kel kanol jütön nenropiko glöbis mödik; labol i günülis tel, me kels kanoy jutön mälna ünü minut bal. Ab ob binob flen e jelodan ola *Haci Halef Omar* ed ai pajelodöl fa ob, ebinol sefik äs ai pajelodöl fa *Âlâ* e Profetan. Id adelo ogaledob gönü ol, dat neflen no okanom dämön heri semik kapa olik!"

"Spelob atosi," ägespikob vemo fefiko, do töbo äneletob smilili. *Halef* smalik oba äluglorükom viliko, ab äsevob dönu, das äkanob konfidön omi in tef alik. Ya omaifüköl dönu mudi ad glorükön oki it, päropom fa kompenan obsik.

Ilüvobs *Jirvan*avilagi ya dü gödalit e pikompenobs fa *Jeiq* ona su dilil vega. Nu loföd pianiko ivedon litikum ed anu stral balid sola suixänöl äfliton bei obs ad litükön vatis fluma *Zab* me lits lenidik. Nu dugan obas äbunom de jevod, äkienom ko logod lüodü loföd ed ävogädom, setenüköl bradis :

"*la jems, ia jems, ia jems!* - o sol! o sol! o sol!"

Äblibom su kiens jüs glöb filik idatovon lölöfiko love horit, poso äsuxänom jevodi dönu.

Pisüpädob, ed äsäkob omi :

"Binol-li *ceside* (= leplekan diaba)?"

"Nemoy obis so, o söl," ägespikom, e boso epaudöl, äfovom :

"Nu fovo no lükonfidol-li obe oli?"

"Kikodo säkol-li somikosi?"

"Neai elilol-li menis, kels espikons mu badiko dö obs?"

"Suvo elilob atosi, ab olükonfidob ole obi dönu. Bevü *cesidi* eseivob menis gudik mödikum, ka bevü cils ela *Mohámed* e mödikans de *Jeiq's* e *Kaval's* omas evedoms flens obik."

Äsuilogedom pesüpädölo.

"Qodiè (= o бүdal) sevol-li cifs e predalis elas *cesidi*?

"Si; äkomob dü zäl gretik in *Bädri* ed äbinob lotan ela *Jeiq Adi*."

"Pardolös, o söl, no däloy, das slaman semik komom dü zäl gretik!"

"No binob slaman, ab kritan. Ab hiat, dünan oba *Haci Halef* binon *Merd al Islam*, e dönu ädalom komön."

Älogob logodi nekredovik ela *Ceside* ed äsetirädob eli *Melek-Taus* obik (= vöd, kel sinifon tonodo "reg hipaf), keli älabob as lagoti in lefad zü särvig dis klot. Anu posä ilogom fomi ota, ävokädom ko stun gretikün :

"O *Melek -Taus*, keli leseans te gudiküns ela *Mir Jeiq Qan* getoms ai!
O söl, if verato binol kritan e no *ceside*, nem ola binon *Kara Ben Nems*!"

"Enemoy obi soiko in län et."

"Klu ol, binol-li foginan, kel ekomipol ko obikans ta soldats ela *Mutésarif di Mósul*?"

"Si; ven ädedietob obi, el *Mir Jeiq Qan* ägivom eli *Melek-Taus* at obe as mali daseva, if oneodoböv dünis de *ceside* seimik."

"Qodië, *ceside* alik oblümon ad givön lifi oka pro ol, if ulogom mali jerik at. Būdölös ai utosi, kelosi osötob dunön; odunob valikosi!"

"Vipob te, das oblinol obi sefiko lü *Zibar-Kurdänans*."

"Ojenos, o sö! Is flum binon ed us, len jol seaton *kelek* (= floted pemeköl me hikaparaskins pesubladöl), kel opolon obis love vat."

"Floted duton kime-li?"

"*Nezanum* (= cif vilaga) ebumom oni; ye lödan alik vilaga dalom gebön oni."

"Nek votik-li?"

"Nek."

"Klu ebinoms vilagilödans, kels is elovevegoms ya bü obs!"

"Adelo-li?"

"Si; ekö vegeds nulik jevodas tel. Is deto *kelek* eseaton ed us monitans ekömons. Stags vatöfik äglofons; bü düp ba bal äpodätagns. Telans at elaboms kodi kinik ad golön lü jol etflanik-li? Flum binon mied is - klu ogoloms te lü *Zibar-Kurdänans*. Kikodo no monitoms-li ko obs?"

"Söl - ba binoms mans vilaga votik, u kels ledutoms lü tribüti votik, kels fädo te etuvoms flotedi, ed egeboms oni."

"No; binoms mans tel vilaga olsik. Dünan oba elogom omis, ven ämomonitoms."

Älogedom meditölo fo ok e süpo äseiton nevilädiko nami sui gleipäd neifa, kel äbinon vaf soelik oma.

(Dil kilid kanols reidön in Sirkülapenäd mula balidkömö!)

NUNS SE VOL LÖLIK

Nuned pro alans

Smök dämükon breini e visedäli bäldikanas. Nolavans Britänik examoms bäldikanis mätlumfuldeg ko lifayels mäldeglul u plu ad registarön kösömotis onas tefü smök e drin, e ad leigodön onis ko visedäl pösodas at. Pos yel bal, degmäldil alik eperon visedäli bosik. Fal äbinon jüs folna geilikum lä smökans, ka lä nesmökans u smökans büik. Smök läsükon bludaduflumi du veins, kel kanon kodön fikulis ladik.

Geilöp südöfik

Ma nunod yelik de noganükam bevünetik privatik : el "*Transparentia*," Suomiyän binon län pu rübik in vol. Esumon pladi stümik at, keli dü yels kil edalabon Danän.

Utans, kels sevons gudiküno numön

Studans mäl se Tsyinän äbinoms vikodans lä Pleds Bevünetik Lümpik Matematik in zif Washington (Tats Pebalöl) ün Yulul yela 2001. In mäted finik, kvip Tsyinänik evikodon kvipis Lamerikänik e Rusänik, kels efinons in plad telid. Kobo, Tsyinän egeton könis goldik mäl, Rusän egeton könis lul e Tats Pebalöl egetons könis fol. Letälenans matematik se Tsyiosenän Sulüdik, Bulgarän e Lindiyän id egetons könis. Läns jöldegkil ekompenons in Pleds Lümpik Matematik, kels erigons in Rumän.

Düp kinik binos-li, begöl

Bijop zifila : Bergamo in Litaliyän Nolüdik vilom, das kloks glügas seilons bevü düp teldegbalid soara e düp velid göda. Büo, kloks ela Bergamo etoenons düpi lafik alik. Ab bijop tikom, das mens it dalabons glokis anu, e no neodons meis bis laodik somik.

Nilikünan, begöl

Cinädan Danänik ebumom laviani balid itjäfidik pro mens. Desin binon, das visitans zälas ela "Rock" paveigons medü polataned da cem, kö pabanons e paklinükons me kefs tülöl; fino pasobükons e palavons. Flano paveigons klots pösodas tefik in bogs vato-nedugolovik. Sperimänt pedunon ya ko lavian menik at lä zäl "Hurricane" in zif Bremen (Deutän).

RÄTILS PRO FAMÜL LÖLIK

1. Ninükolös tonati, kel defon :

K	N	H
P	T	L
I	N	?

2. Dislienükolös utani, kel no binom noatädan famik :

ZOTRAM
SATSURS
REVID
MOALES

3. Ninükolös vödl, kel lölöfukon vödl balid, e kel primon vödl telid :
(Geidavöd : Neviet)

B - - G

4. Dislienükolös nemi zifa sököl, kel no leduton :

WASHINGTON, LONDON, PARIS, BONN, MADRID

5. Ninükolös nümi, kel defon :

